

PAKAK DIBERI KELONGGARAN, PUKAT TUNDA DIHARAMKAN

16 March 2016

- **The Borneo Post Online**

Oleh Clare Cinderella



DIBENARKAN: Pukat sorong juga dikenali pakak atau sobor yang dipasang pada sebuah bot nelayan diberi kelonggaran untuk digunakan menangkap bubuk.

MIRI: Pukat sorong berjaring halus atau dikenali sebagai pakak diberi kelonggaran untuk digunakan menangkap bubuk (udang geragau) sepanjang tempoh kajian dilakukan bagi mengenal pasti kaedah penangkapan lebih selamat dan mesra alam.

Ketua Wilayah Perikanan Miri Buniamin Kiprawi berkata tempoh kajian yang dilakukan oleh Institut Penyelidikan Perikanan Sarawak dan Universiti Malaysia Sarawak (UNIMAS) dijangka mengambil masa sehingga dua tahun.

Bagaimanapun, pukat tunda kecil dan pukat tunda bergalang yang digunakan segelintir nelayan tempatan menangkap bubuk adalah diharamkan kerana kesannya lebih buruk ke atas ekosistem marin dan merosakkan dasar laut.

“Berbanding pukat tunda kecil dan bergalang kesan penggunaan pakak adalah minimum sebaliknya teknik menangkap bubuk menggunakan pukat tunda bukan sahaja merosakkan habitat setengah hidupan laut malah boleh memusnahkan kawasan pembiakan ikan dan terumbu karang.

“Jika keadaan ini dibiarkan bukan sahaja ekosistem terjejas dan dasar laut musnah malah sumber perikanan atau marin turut terjejas dan berkurangan,” katanya.

Beliau berkata demikian ketika ditemui pada Majlis Interaksi Bersama Komuniti Perikanan – Cabaran Strategik Ke Arah Pengurusan Sumber Perikanan Tangkapan Mapan di sini, semalam.

Menurutnya, masyarakat nelayan juga menerima kesan tindakan mereka dan program itu memperjelas kepada golongan nelayan tentang dasar pembangunan mampan dan usaha pemuliharaan dilakukan oleh jabatan tersebut.

Terdahulu, Timbalan Pengarah Perikanan Laut Sarawak Bohari Leng memberi penjelasan tentang usaha-usaha pemuliharaan dan dasar-dasar pembangunan mampan serta tindakan mengharamkan penggunaan pukat tunda.

Hadir sama Menteri Muda Perhubungan Datuk Lee Kim Shin, Pengarah Jabatan Perikanan Laut Sarawak Belayong Nyuak, wakil Pengarah Institut Penyelidikan Perikanan Sarawak dan Labuan Jamel Musel serta Pengerusi Persatuan Nelayan Kawasan (PNK) Miri Kaunselor Jamali Basri.

Sementara itu, Lee dalam ucapannya berkata pertemuan itu menyaksikan kedua-dua belah pihak, nelayan dan Jabatan Perikanan mencapai kesepakatan dalam isu penangkapan bubuk selepas kelonggaran diberi bagi membolehkan nelayan menggunakan pakak menangkap bubuk dan larangan penggunaan pukat tunda.

Katanya sebaik isu berhubung pukat tunda timbul beliau memaklumkan kepada Jabatan Perikanan agar tidak mengambil sebarang tindakan seperti menahan atau mengenakan denda kepada nelayan, sebaliknya hanya menghalau mereka agar berhenti menangkap menggunakan pukat tunda.

“Kita faham mereka hanya menjalankan tugas menjaga serta melindungi sumber dan hasil perikanan agar terus mampan dengan pelaksanaan dasar-dasar atau peraturan tertentu.

“Namun, kita mahu Jabatan Perikanan turut mendengar suara-suara nelayan supaya dasar dilaksanakan diterima dan difahami oleh mereka,” katanya.